



UPA16/51
21. april 2016
Ane Hansen

Illumik pisinnermut atatillugu illup qanoq innera pillugu naliliinermik sanasoqartalernissaanut inatsisitigut piumasaqaateqartalernissamut atatillugu aningaasatigut iluaqutissanik ajoqutaasunillu misissuisoqarnissaa pillugu kiisalu illumik pisinnermut atatillugu illut nukimmik atuisarnerat pillugu nalunaaqutsiisarnissap inatsisitigut piumasaqaataalernissaanut atatillugu misissuisoqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut. Aamma misissuinermi ilanngullugu paasiniaqquneqarpoq sillimmasiisarfiit piginnittut nikinneranni suleqataanissaminut piumasaqaatigisinnaasaat kissaataallu. Misissuinerup innerera Inatsisartunut agguanneqassaaq 2017-imi ulloq 1. januaari tikitsinnagu.
(Inatsisartunut ilaasortaq Justus Hansen, Demokraatit)

Nunatsinni illut innuttaasunik pisortanillu pigineqartut pitsaassutsimikkut assigiinngiiaartupilussuupput. Taamatut aamma assigiinngitsigaat illut tuniniarneqarnerani nalilersuisarnek, illoqarfimmi sumiinneq apeqqutaatillugu akimikkut nikigasorujussuunnaallutik. Assersuutigiinnarlugu maani Nuuk-mi illoqarfiup qeqqani illut isariaannaat ilaatigut 2 mio.-nilerlugit tunineqarsinnaasarput, illullu pitsaanerungaartut sinerissami isorliunerusuniikkunik ilaatigut 50.000,-kr. Ataallugit akilerlugit pisiarinqarsinnaasarlutik. Taamaammat takorloorneqarsinnaavoq illunik pisinnermi illup qanoq inneranik naliliisitsisalernissap aamma illunik tuniniaanermi qanoq assigiinngitsigisumik sunniuteqarsinnaanera.

Taamaakkaluartoq Inatsisartunik ilaasortap Justus Hansen-ip illunik nioqquteqarnermut atatillugu inatsisiliornissaq siunertaralugu misissuisoqarnissaanik siunnersuutaa soqutiginartutut isigalugu oqallisigisimavarput.

Illut innuttaasunik pisortanillu pigineqartut aserfallattaalineqarnermikkut aamma assigiinngitsorujussuarmik inissisimapput. Pisortat illuutaat maanna ukiuni kingullerni aserfallassimavallaarneri pissutiginerullugit nutarteqqinnissaannut akilersinnaangitsutut nalilikkat INI A/S aqutugalugu tuniniaqattaarneqartut pitsaassutsimikkut akimikkullu aamma assigiinngiiaartupilussuusut takusarpagut. Innuttaasullu illusisimasut aamma ilaqarput pisiarisimasaminnik pitsaassusaat aserfallassimanerilu eqqarsaatigalugit akisunaarinnissimasutut misigisimasartunik ingammik illut oqorsaatilukkaangata kiassarnermut akisunaarisartunik. Taamatuttaaq aamma ipput illuutillit akornanni illumik niuerneq eqqarsaatigalugu.

Soqutiginartorujussuuvoq misissuataassallugu sinerissami tamani illup qanoq issusia pillugu nalunaarsuinermi ilinniagaqarsimasunik nalilersuisitsisalernissap inatsisiliussinnaanera pillugu misissuinissamik siunnersuuteqarneq.

Siunnersuummut Naalakkersuisut akissutaat assut eqqumiittutut isigigatsigu isertuussinnaanngilarput, tassami Naalakkersuisut isumaqarput siunnersuut una danskit pigisanik il.il. aalaakkaasunik pisinnermi atuisut illersorneqarnissaat pillugu inatsimmut nalunaarutaat, kiisalu danskit illuutini nukissiutinik atuinerannut nalunaarsuisarneq pillugu inatsisaat tungavigineqartut. Siunnersuuteqartormi ataatsimilluunnit siunnersuummini danskit inatsisaanik atuutilersitsinissamik oqaasertaliinngilaq taamaammat Naalakkersuisut akissutaat eqqumiiginarpoq.

Aamma suli eqqumiinneruvoq Naalakkersuisut isumaqarmata siunnersuuteqartup inatsiliorfigineqarsinnaasutut tikkuartugai danskit inatsisaannik kunngip peqqussineratigut kalaallit nunaannut atuuttussanngortinneqarsinnaasut oqaatigineqarmat.

Sanaartornermi oqartussaaffik Nunatsinnik oqartussaaffigineqarmat Naalakkersuisunut apeqqtigerusuppara sanaartornermi oqartussaaffiit ilanngullugit danskit naalagaaffianut uterteqqinnialersaalersimaneraat.

Taamatut oqaaseqarluta Inatsisartuni ilasortap Justus Hansen-ip siunnersuutaa Inuit Ataqatigiinniit soqutiginartutullu isigalugu aappassaaneerneqartinnani Inatsisartut sanaartornermut ataatsimiisitaliani misissuataarneqassasoq inassutigaarput.